


BOBONGI BE

 . . . Mpe kozala awa mpo na kosambela elongo na bino. Mpe sikawa, liboso mpenza ya Liteya, nazali na moninga na ngai ya malamau awa na etumbelo na mpokwa oyo, Docteur Lee Vayle, ya lingomba Baptiste ya Liboso na Lima, na Ohio, oyo azalaki moko na basungi ya koyangana ya Lima. Natunaki ye, wana nazalaki koya na mpokwa oyo, soki akolinga te koloba liloba moko na eyanganelo, ntango mosusu na ntina na oyo etali koyangana ya Lima, mpo na ngonga moko to mibale oyo ekolanda. Mpe nasepeli ko, esengo ya kotalisa bino na mpokwa oyo, Docteur Lee Vayle, Baptist mosusu, oyo azwi Molimo Mosanto.

² [Ndeko Lee Vayle alobi miníti zomi na minei, kotatola na ntina na bato mingi oyo bazali kobikisama.—N.D.E.] Amen. Nzambe ápambola yo mpe, Ndeko Vayle.

³ Oyo wana ezalaki makasi mingi mpo na mokengeli Batiste moko, boye te? Na bongo, tozali na esengo mingi ya kozala na Ndeko Vayle elongo ná biso. Mpe na bosolo bikuke ezali ya kofungwama mpo na ye kozonga kotala biso na ntango nyonso oyo ye akokoka. Mpe sikawa na mpokwa oyo . . .

Lobi na mpokwa ezali bo—*Bokundami* ya Nkolo Yesu.

⁴ Mokolo ya Lomongo na ntongo, ezali liyangani ya ngonga motoba ya ntongo ya kobima na mói. Mpe nandimi ete ndeko asili kopesa liyebisi oyo etali eteni oyo ekolanda ya liyangani.

Sikawa, tóbondela mwa moke.

⁵ Nkolo Mopambolami, Liloba na Yo ezali Solo, mpe totondi Yo botondi mpo na mobali oyo akoki kosalela Yango, kozanga kobanga, wana bazali kopesa Yango na bato. Mpe wana tozali kofungola Biblia na mpokwa oyo, to kobongola nkasa na yango, tika ete Molimo Mosanto oyo apambolami áya mpe áfungolela biso Liloba ya lisosoli. Tosengi yango na nzela na Yesu Klisto. Amen.

⁶ Mpokwa monene oyo tozali kokundola, ya bobakami na ekulusu ya Nkolo na biso mopambolami, nalingi kotanga na mpokwa oyo uta na bibebu na Ye Moko ya motuya, Maloba oyo Asíláká kokoma kati na Buku na Ye. Na Santu Matai, mokapo ya 4, biso . . . mpe molongo ya 47 ná ya 48, totángi boye:

Mpe soko bokopesa mbote bobele na bandeko na bino, bozali kosala nini koleka? bakongoli mpako bakosalaka mpe bongo te?

Kasi bóbona be, lokola Tata na bino oyo azali na likolo abongi be.

⁷ Mpe na mpokwa oyo toyebisaki ete tokosolola likolo na mokonza ya *Bobongi Be*. Sikawa biso. . . Ezali lokola motó ya liteya ya ndenge mpenza mpo na kozwa yango na mpokwa ya kobákama na ekulusu ya Nkolo na biso. Kasi lelo, ntango mosusu, bozalaki koyoka na radio, mpe boyokaki mateya ndenge na ndenge mpe batei ndenge na ndenge, ndenge batalisaki mokolo monene ya nsomo wana ntango Nkolo na biso akufaki mpo na masumu ya mokili. Na bongo naponi, na mpokwa oyo, kokendela na likambo yango na lolenge mosusu, mpo na kokóma na likambo yango, boye ekozala na bokeseni moke mpe ekoki kopemisa bino mwa moke. Mpe tika ete Molimo Mosanto mopambolami ápemela Liloba sikoyo wana tozali kosala makasi mpo na komema Yango.

⁸ Nzambe asengaka bobongi be. Tolingi kobatela yango na makanisi, ete ezali na eloko moko ya ndambo te oyo ekoki kokende liboso na Bozali ya Nzambe. Esengeli kozala ya kobonga be, kosámbela na biso, makambo nyonso.

⁹ Sikawa, na elanga na Edene, Nzambe azalaki na Adama ná Ewa kati na elanga. Mpe basumukaki mpe babukaki mibeko ya Nzambe, na kosaláká lisumu, kozanga botosi. Mpe ntango kobúka mobeko ekomaka, kozanga botosi ezali kobúka mobeko. Mpe mobeko ya Nzambe, lokola Ye azali búlee, ná búlee ya peto mpenza, na yango litono moko te ya kozanga búlee ekoki kotelema liboso na Bozali na Ye, ata moke te. Boye, soki lisumu eyaki na mokili na nzela ya kobuka mobeko, boye esengeli kotala likambo ya lisumu liboso mosumuki ákoka ata kotelema liboso na Bozali na Nzambe.

¹⁰ Sikawa, soki mobeko ezali te, boye boyengebene ezali te. Kasi mobeko esengaki, to, boyengebene eséngaka mobeko. Mpe mobeko, ntango ezali—ezali kosalelama, yango ebimisaka boyengebene.

¹¹ Sikawa, na nzela ya mobeko, nzoto moko te ebikisami. Sikawa, mobeko ekoki kobikisa biso te. Mobeko ezalaki kaka eloko oyo etiaki biso na boloko, kasi ezali na nguya ya kosikola te. Mobeko elakisaki biso bobele ete tozalaki basumuki, mpe ekweisaki biso. Yango nde mobeko esengeli kosala. Ezali mpo na komema kokweisama, to kolakisa yo epai wapi libunga na yo ezali. Na bongo mobeko, na yango moko, ekokaki kobikisa te. Ekokaki kaka kosambisa.

¹² Mpe Nzambe azali bulee mpe sembo, Asengelaki kozala na makoki ya kosambisa. Asengelaki kosambisa mosumuki mpamba te abimaki libanda na mindelo ya ngolu, mpe akomaki mwana-mboka mobuki na mobeko. Na boye, esengelaki kotala likambo na ye.

¹³ Mpe mobeko nyonso ezalaka na etúmbu, mpamba te, etúmbu ya kobuka mobeko na Nzambe ezali liwa. Mpe yango esengelaki

kotinda kufa na libota na bato. Mpe libota mobimba ya bato ezali na nse na etumbu ya mobeko oyo.

¹⁴ Sikawa, ntango Adama ná Ewa basalaki lisumu, nzela moko ezalaki te, nkisi mosusu ezalaki te oyo ekokaki kosala ete bákoka lisusu kotelema liboso na Bozali na Nzambe, kaka soki lisumu oyo ésilisama. Mpe moto moko te akoki kosala lisumu ya lolenge nini, ézala ya moke ndenge nini to ya monene ndenge nini, lisumu moko wana esengeli kosilisama liboso ete moto oyo asalaki yango ákoka kotelema liboso na Bozali na Nzambe Mosanto.

¹⁵ Boye, na yango, ntango Adama na Ewa basalaki lisumu mpe babukaki mobeko, bakomaki bato na kufa. Mpe mobeko esengelaki kokokisama, na bongo yango etiaki libota mobimba ya bato na nsé na etumbu ya kufa. Boye soki tokoki bobele kofandisa kimia mpo na ngonga moke sikawa, makanisi na biso, mpe kotala elilingi monene oyo, mpe komikanisela ete moto nyonso awa azali kati na likambo oyo. Mobali, mwasi mpe mwana nyonso, azwami kati na etumbu ya kufa, na nzela ya bobúki mobeko oyo ya motó ya libota na bato, Adama; na nzela na ye ya kobuka mobeko, moko na moko na biso akweisamaki na lisumu.

¹⁶ Mpe likambo ya lisumu esengeli kosilisama. Mpe bongo, Nzambe, kati na kozanga suka monene na Ye mpe bolingo monene na Ye. . . Mobeko ezalaki mpo na kokabola mosumuki na Mokeli na Ye; na bongo asilisamaki, mpe asilisamaki mobimba, nzela mpo na ye kozonga ekokaki kozala te bobele soki lisumu wana esilisamaki. Mpe na ntango wana ekozala pete mpenza kondima na kosilisama mobimba ya mosumuki sukasuka, mpamba te ye asili kokabwana na mobimba mpenza ná Bozali na Nzambe mpo na libela.

¹⁷ Sikawa bótala lisumu oyo. Mpe ndenge Nzambe, lokola azalaka sembo, Akokaki kosala eloko mosusu te bobele kozala sembo, mpamba te Ye azali liziba ya bosembo nyonso, boye eloko mosusu ekozala te mpo na Ye kosala, bobele kopesa etumbu mpo na bobúki mobeko oyo. Mpe etumbu yango ezalaki kufa, mpamba te Alobaki, “Mokolo bokolia yango, mokolo yango bokokufa solo.” Sikawa, ezali elili moko ya molili nde tozali na yango awa.

¹⁸ Kasi na bongo soki tozongi sima mosika moke koleka, mpe totali bizalela mpenza ya Nzambe, Biblia ezali koyebisa biso polele ete “Nzambe azali bolingo.” Kasi ata bongo, lokola azali bolingo, Asengeli kozala sembo. Boye, bolingo elingi koloba kaka te eloko oyo ekoki kobondisama mpe kosakana na yango. Bolingo ezali boyengebene na Nzambe.

¹⁹ Sikawa, ntango Nzambe amonaki ete bana na Ye babukaki mobeko na Ye, mpe ete basengelaki kokufa na liwa, na sima bolingo nsomi ekotaki kati mpo na kofungola nzela. Mpamba te, Nzambe amonaki ete bana oyo basengelaki kolongolama na

mobimba mpenza liboso na Bozali na Ye. Likambo mosusu ya kosala ezalaki te, mpo basilaki kobuka mobeko na Ye, mpe etumbu ya mobeko na Ye ezalaki kufa.

²⁰ Na bongo bolingo na Nzambe ebimaki mpo na bato na Ye. Mpe ntango bolingo na Nzambe epesami, ngolu ya bonsomi ebimisaka ntina ya bolingo yango. Mpe Nzambe, na boyebi makambo liboso, ntango Alingaki libota na Ye mingi mpenza; ata bongo, ná etumbu yango, Asalaki ete kufa ya eloko mosusu ézwa esika ya mosusu kati na elanga ya Edene. Yango ezalaki ete, Azwaki ekelamu oyo esalaki eloko te, mwana-mpate oyo ayebaki lisumu te, mpe akendeki kozwa eloko mosusu, mpo na kosala mpe kokufa na esika ya mosumuki oyo akweisami. Mpe ezalaki mwana-mpate, oyo abomamaki, mpo na kobatela bomoi ya bato na Ye.

²¹ Kati na Kondimana na Kala mobimba bapesaki makila ya bana-mpate, ba-ntaba, ba-mpate, ba-ngombe mibali mpe basi, kufa ya kozwa esika ya mosusu. Kasi, nyonso kati na nkita monene ya Nzambe, ezalaki kuna na sima, kati na makanisi na Ye Eloko ya solo ezalaki koya, oyo elingaki kozala . . . Nyonso wana ezalaki bililingi ya Eloko ya solosolo oyo ezalaki koya. Mpe Eloko ya solosolo oyo esengelaki koya, ezalaki Mwana na Ye ya likinda. Bana-mpate nyonso oyo bakufaki ezalaki bobele elilingi. Mpe elilingi ezali bobele ngámbo negatif ya eloko. Mpe ezalaki bobele kolobela na ntina na Kalvári oyo ekoya.

²² Sikawa mpo na elilingi moko ya oyo, tóbalola ba-Biblia na biso, na Buku ya Baebele, mpe tokamata awa oyo Paulo, ntoma monene azali kosolola, komeka kokabola makambo oyo mpo na biso. Na mokapo ya 10 ya Buku ya Baebele, totángi boye.

²³ Mpe nalingaka na ngai mpenza Liloba! Liloba ezali Solo. Mpe nasepelaka kotánga Yango liboso na eyanganelo na ngai, mpo nayebi ete na kosambisama, nakotelema elongo ná bango. Mpe ekosenga na ngai kosamba. Na bongo soki namemi Yango uta na Liloba, boye nakokweisama te; mpamba te Ezali Liloba, mpe Nzambe azali na mokumba ya Liloba na Ye.

²⁴ Tozali komona ebele lelo, ya bapalanganisi nsango-malamu mpe bongo na bongo, bazotonga zingazinga na bato ya lokumu. Oo, ezali likambo moko ya nsoni! Mpe tomoni ete, na kokendéke na ba-losambo, tokendeke na losambo mpe okomona mobateli songolo, azali na mwa ezaleli moko na ntina na ye, mwa koningana moko boye. Soki botali malamumu te, liyangani mobimba yango ekozua molimo yango. Soki azali bobele na mwa koningana, to alengisaka motó na ye, to eloko moko ya mwa ndenge, ee, lingomba mobimba ekozua likambo yango. Mpe tozali na yango, lelo, kati na mangomba na biso ya mikolo oyo, epai wapi ezali kaka komiyoka nzoto ná makambo mike ya ndenge wana. Mpe ezali mpenza mobulungano! Kasi, oh,

balingami bandeko na ngai, soki etikálá kozala mpenza na ntango moko oyo esengelaki tozala kati na Liloba, ezali lelo!

²⁵ Bomoni, nakoyina kotelema na kosambisama mpe koyeba ete nazalaki na mwa nungunungu moko, eloko moko lokola mwa emoniseli ya kokesene, mpe nakambaki bato mabe. Nalingi te ete bázala na molimo na ngai likolo na lolenge na ngai ya kosala makambo, kasi nalingi ete bázala na Molimo ya Nzambe na nzela ya Liloba na Nzambe, oyo ebotaka Solo.

²⁶ Boye na libaku monene oyo na mpokwa oyo, nakolinga kotánga longwa na Liloba na Seko ya Nzambe. Sikoyo tozomona ete mobeko ezalaki mpo na mibu ebele, kasi mobeko ekokaki kolongola lisumu ata moke te. Lokola nalobaki yango liboso, ezalaki bobele ndako ya boloko. Ezalaki molúki-luki monene oyo ayebisaki yo eloko yo osalaki, kasi ezalaki na ebikiseli moko te mpo na kosikola yo. Etiaki yo kati na ndako ya bodefi ya ndangá, kasi Mosikoli mpo na kobimisa yo libanda azalaki te, ná yango. Ekotisaka yo bobele na boloko, koyebisa yo ete ozalaki mosumuki. Kasi sikoyo bótala na Baebele, mokapo ya 10, wana tozali kotánga.

*Mpo mobeko oyo ezalaki na elilingi ya makambo
malamu makoya, mpe elembetele mpenza te. . .*

²⁷ Bómikanisela, ezalaki elilingi ya elembetele ekoya. Elilingi etalisaka kaka ete ezali na elembo moko oyo ezali kosala elilingi. “Elilingi ya makambo makoya, kasi elembetele yango mpenza te.” Bótala, “ya makambo. . .”

*. . . elembetele ya biloko, ekoki soko moke te na mbeka
wana izalaki kopesama. . . mbala na mbala kokomisa
oyo azalaki koya na kobonga be.*

²⁸ Sikoyo, Nzambe, na ebandeli, asengaki bobongi be. Yesu, ntango Ye ayaki na mokili, alobaki, “Bóbonga be, lokola Nzambe na Likolo abongi be.” Mpe mobeko, oyo ezalaki na elilingi ya makambo makoya, ekokaki ata moke te kokomisa mosambeli na bobongi be. Bosimbi elilingi yango? Sikoyo tózongela likambo yango mpo bóyeba malamú mpenza ete bozangi likambo yango te. Nzambe aséngaka bosanto bobongi be. Moto moko te akoki kotelema liboso na elili na Ye, ná mwa litónó moko ya lisumu. Yesu atatolaki motindo moko, mpe alobaki: “Bózala babongi be, kaka ndenge Nzambe na Likolo abongi be.”

²⁹ Mpe Biblia elobaki: “Mobeko ekokaki ata moke te, ná bambeka na yango, kokómisa moyei na kobonga be.” Na bongo, mobeko ekokaki kobongisa be eloko moko te. Ezalaki kaka motalisi. Ba-mbeke oyo, ezalaki kopesama mbula na mbula, ekokaki ata moke te kokomisa mosambeli na kobonga be. Boye na ntina wana, moko te na nsé ya mobeko, to na kobateláká mibeko, to na nsé ya bililingi, akokaki kobonga be.

*Mpo (molongo ya 2) na yango ikokaki kotika
kopesama te? . . .*

³⁰ Soki ezali na eloko moko oyo nakoki kosala mpo na komikómisa malamumu be liboso na Bozali na Nzambe, boye Klisto asengelaki kokufa te mpo na ngai. Soki ezali na eloko moko oyo okoki kosala, oyo ekozala na litomba moko liboso na Bozali ya Nzambe, boye Klisto akufaki mpamba. Bobateli mibeko te, mabanzo na yo ya botosi mibeko te, eloko moko te ya bosantu na yo moko, makambo te oyo yo okokaki kotika kosala, kotika kokosa, kotika koyiba, kotika komela likaya, kotika kokende na cinema, ata bongu osili na yo kobunga. Eloko moko te ekoki kosala yango! Kokóta mangomba, mimesano ya mibeko, milúlú, mabatisi, milongo ya lingomba, kotánga malako, kotánga-tánga mabondeli makambo nyonso wana ekokaki kosunga te. Osili kobunga! Eloko moko te oyo okoki komisalela, mpamba te ozali mosumuki na nsé ya kokweisama. Mpe ezali na nzela moko te na kati na yo moko, to endimeli moko, to eloko moko oyo okokaki kosala to kokanisa, na yo moko, oyo ekokaki kozala na litomba liboso na Bozali ya Nzambe, mpamba te ozali mosumuki mpo na kobanda.

³¹ Mpe Biblia elobi, ete biso nyonso tobotamaki kati na lisumu, totóngámaki kati na masamu na nko, toyeyi na mokili kolobáká nkutá. Mpe Nzambe akokaki kozwa moto moko te mpo ákufa na esika ya mosusu, mpamba te moko akweisami kaka ndenge moko ná mosusu. Liboso na Bozali na Nzambe, episkopo mokonzi oyo abotami na mokili oyo akweisamaki ndenge moko na molangwi masanga ya somo mpenza koleka na kati ya engumba. Moko akoki kolongola lisumu ya mosusu te.

³² Yanga wana, Azwaki bomoi ya nyama moko eyebaki mabe te, mwana-mpate moke. Mpe na nsé ya Kondimana na Kala, mibeko ezalaki, ntango moto asalaki lisumu, azalaki komema mwana-mpate na etumbelo. Toloba soki abukaki moko na mibeko, azalaki komema mwana-mpate mpe kolalisa yango likolo na etumbelo, azalaki kotia maboko na ye likolo na mwana-mpate yango mpe azalaki koyambola masumu na ye, ete azalaki na libunga mpe ayebaki ete akweisamaki. Ya . . . mpe ezalaki . . . Mibeko esengaki kufa. Mpe amemaki mwana-mpate na esika na ye. Mpe ntango a . . . nkingo ya mwa nyama yango ekatamaki, mpe ebandaki kotuta-tuta mwa makolo na yango mpe kobélela. Soki osilá komòna mwana-mpate kobomama, kolela ya mawa nini oyo! Mwa eloko moke ya mawa oyo ekobanda kobélela, mpe mwa mosisa ya nkingo na ye ekatami. Mpe wana ezali kobete-beta makolo mpe kotetemeka, mpe ntango emisemboli, mpe etetemeki lisusu mpe ebeleli, mpe makila ezopanzana bipai nyonso, ekopolisa mwa nkunza na yango, mpe maboko ya mosambeli.

³³ Mpe wana mosambeli azoyeba mpenza ete, asalaki ekobo, akósaki, ayibaki, ata kokweisama na ye ezalaki nini, to ata makanisi ya mabe, ézala oyo nyonso yango ezalaki ata elilingi ya moke mpenza, akweisamaki, mpamba te ezalaki lolenge na ye.

Azalaki mokweisami, ntango mosusu na mposa te, kasi longwa na lolenge na ye azalaki mokweisami. Mpe asengelaki koyeba ete mwa mwana-mpate oyo ayebaki mabe moko te akufaki na esika na ye. Mpe ayokaki mawa mpo na mwa eloko yango.

³⁴ Kasi moto yango, bobele ntango mwana-mpate akufaki, ná makila ya mwana-mpate na maboko na ye, abimaki na ndako yango ná mposa yango moko kati na motema na ye, oyo azalaki na yango na ebandeli. Mpo na nini? Mpo bomoi oyo ezalaki kati na mwa mwana-mpate. . . Bomoi ezalaka kati na makila. Bomoi na yo ezali na kati ya makila na yo. Toyebi yango. Mpe bomoi kati na makila ya mwana-mpate ezalaki bomoi ya nyama, yango wana ntango mwa misuni na yango ebukamaki mpe bomoi ebimaki kati na nyama yango, ekokaki kozonga epai na mosambeli te, mpamba te mosambeli azalaki moto.

³⁵ Makila ezalaki kosala mosala ya ezipelo, kasi ekokaki kolongola masumu na kobonga be te; mpo moto yango azalaki kokende, na mposa yango moko ya kosala lisumu, ndenge azalaki na yango liboso. Kasi, na kosaláká boye, azalaki kotála liboso na ntango oyo Mwana-mpate oyo abongi be akoya. Mpe asalaki yango na mbeka ya kotumba, mpo yango ezalaki nzela bobele moko oyo ayebaki.

³⁶ Boye, bomoni, ntango makila ezalaki kosopana, mpe bomoi etikaki nyama yango, ekokaki kozonga epai na moto yango te; mpamba te, moko azalaki nyama, moko azalaki moto; nyama oyo esalaki mabe te, mpo na moto oyo akweisamaki.

³⁷ Kasi, oh, mokolo moko, eleki mibu nkoto mibale, Mwana-mpate ya Nzambe abotamaki na mwa eliélo na Beteleme, mpe akambamaki lokola mpate kokende na ebomelo na yango. Esili koleka mibu nkoto moko na nkama libwa, sima ya nzanga oyo, na ngonga ya misato Akufaki. Mpe Mwana-mpate na Nzambe oyo azangá litónó, azangá mpamélá, abakémáki na ekulusu ya Kalvari mpe akufaki mpo na mosumuki nyonso. Sikoyo ntango mosambeli azali koya epai na Mwana-Mpate oyo, na kondima! Mpe oyo ezali Mwana-Mpate ya lolenge moko ekeseni. Ezali te Mwana-Mpate lokola mosusu.

³⁸ Moto moko te akoki koya epai na Mwana-mpate oyo, bobele soki Nzambe abendi ye libosó. Bomoni bonsómi ya Nzambe? Oh, nazolikya ete likambo oyo ezokota mpenza na bozindó sikoyo. Bótala. Nzambe ayebaki ete Azalaki na bampate na mokili oyo. Ayebaki ete Akozala na bato oyo bakobikisama, mpe bolingo na Ye etalaki na nsé mpe emonaki baoyo bakobikisama; yango wana, na boyebi-makambo-liboso, Abongisaki Lingomba moko liboso mpo na kokutana na Ye kuna, kozanga litónó to liniúniúkú. Mpe soki Nzambe asengaki Lingomba moko ezangá litónó to liniúniúkú, Asengelaki kozala na eloko moko mpo na kosala yango bongo. Akokaki kosenga yango te, boyengebene na

Ye, kosambisama na Ye ekokaki kotika te ete Ye ásenga eloko ya ndenge wana soki ezalaki na lolenge moko te ya kosala yango.

³⁹ Mpe moto akoki kosala yango na ye moko te. Azalaka mokwei na mobimba. Nzambe atikaki ye ámona yango na nzela na mobeko, na nzela na basambisi, mpe kati na Kondimana na Kala mobimba. Atindaki basakoli, Atindaki moyengebene, mpe bamonaki ete moko na moko akweaki.

⁴⁰ Na bongo, Nzambe, na nzela ya ngolu na Ye ya bonsomi, atindaki, uta na bikuke ya Nkembo, Mwana na Ye ya likinda, mpo na kozwa esika na biso.

⁴¹ Bókanisa lisusu, soki Álóbaka na pápa wa Roma ete ázwa likambo yango, alingaki kokoka kosala yango te. Soki Álóbaka na episkopo mokonzi ya Canterbury ásala likambo yango, alingaki kokoka kosala yango te. Soki Ábengaka tata mosanto momemiami ya koleka to episkopo ya mokili, alingaki kokoka kosala yango te. Alingaki kobwakama mosika mpenza kaka lokola Yuda Mokeliota abwakamaki. Akokaki kosala yango te, mpamba te “abotamaki kati na lisumu, atongamaki kati na lisumu na nko, ayaki na mokili kolobáká lokutá,” mpe azalaki na bosenga na mbondi mpo na ye moko.

⁴² Aleluya! Kasi Moko ayaki uta na bikuke ya Nkembo; mosusu te, moto te, moto malamumu te, Moyuda te, moto ya Mabota pe te. Azalaki eloko moko te na nsé ya Nzambe na-Nguya-nyonso, oyo abombami na nzoto ya moto. Ayaki, Ye moko, kopesa Makila na Ye Moko, mpo Yango eyaki na nzela na koyebana na nzoto te. Koyebana na nzoto ezalaki na likambo moko te ya kosala ná yango. Kasi Ye azipaki mongondo moko na elilingi, mpe abotaki longwa na momboto ya Makila oyo Akelaki, Ye moko, Moto oyo ayebaki mabe te.

⁴³ Bongo lobiko na ngai, ya yo, na mpokwa oyo, esimbami na makoki ya misala na biso moko te. Esimbami na bonsomi ya ngolu ya solo ya Nzambe na Nguya-nyoso Oyo aponaki biso kati na Ye. Solo mpenza. Nakokaki kozala na kobonga be ata moke te, yo pe okokaki kozala na kobonga be ata moke te. Mpe tozali kobeta tólo te ete tobongi be. Kasi tozali na kobondisama moko oyo, ete, kondima na biso epemaka kati na Mbeka ebongi be oyo esili koyambama!

⁴⁴ Bongo ndenge nini toyebaka ete tozwi Yango? Ntango mosambeli atii maboko na ye, na kondima, likolo na nzoto na Nkolo Yesu, mpe ayoki nsómo ya lisumu, mpe kotiola ya nsoi na elongi na Ye Moko, ayoki kolela ya Getesemani, kobunda na liwa ya Kalvari, mpe ayebi ete akweisami, mpe ayamboli masumu na ye malamumu mpenza, “E Nkolo Mopambolami, nakwei na likambo. Mpe nazali lisusu na makoki mosusu te soki Yo osungi ngai te. Mpe na kondima. . . Ozosenga, Molimo Mosanto, ayei mpe asengi ngai náya. Mpe ngai sikawa, na nzela na kondima, nayambi Yesu lokola Mobikisi na ngai moko.” Bomo wana oyo

eutaki na Ye na Kalvári, ebengamaki Molimo Mosantu, oyo ebombamaki kati na momboto ya Makila na Nkolo Yesu, ezongi epai na mosambeli mpe ebatisi ye na Molimo Mosanto, kati na Nzoto na Klisto.

⁴⁵ Mpe Asili kosambisama. Ozali na ntina ya komitungisa mpo na kosambisama te. Wana ezali ngai kobongwana mpe kotala mwa ekulusu wana, nasosolaka ete yango ezali...etalisaka nzoto na Ye. Mpe sikawa, nzoto yango esilaki kosambisama. Nzambe akoki lisusu na bosembo kosambisa yango te, mpo esili kosambisama. Nzambe abetaki etúmbu ya liwa likolo na nzoto yango. Mpe na ntango nyonso oyo nakoki kozwa nzela mpo na komibómba kati na nzoto yango, kosambisama na Ye ebetaki mpo na ngai mpe mpo na yo. Tozali nsomi! Baloma 8:1, elobi, “Yango wana, sasaipe kokweisama ezali te mpo na baoyo bazali kati na Klisto Yesu, baoyo batambolaka kokokana na mposa na nzoto te, kasi na Molimo.” Tala yango wana, kokweisama moko te! Etali ngai te eloko nini eyaka to eloko nini ekendeke, bobómbami na nsé na Makila.

⁴⁶ Lisusu, tokokóta na Nzoto yango ndenge nini? Bakolinti ya Liboso 12:13, elobi ete, “Na nzela na Molimo moko!” Molimo ayáka ndenge nini? Na nzela ya Mbeka. Molimo afandaki wapi? Na kati ya Makila. Mpo na nini nyama ekokaki kozonga te? Ezalaki nyama. Molimo na nyama ekokaki koya epai na molimo na moto te mpo na kosala eloko moko ná yango, mpamba te molimo na moto ezalaki mosanda ya bomoi ya likolo koleka oyo ya nyama. Kasi molimo ya moto mosusu te ekokaki kozonga. Soki ozali na molimo ya nkoko moko boye, ezali losambo ya milimo. Kasi Nzambe Ye moko ayaki, mpo ete Molimo na Ye Moko, oyo ezali mosanda ya molimo ya likolo koleka mpenza, ákoka kozonga na lolenge ya libatisi ya Molimo Mosanto, epai na mosambeli, na nzela ya Makila na Klisto, mpe kokotisa ye kati na Nzoto. Abatelami!

⁴⁷ Bótala malamumu. Makila ya ba-ngombe mpe ya ba-ntaba ekokaki kosimba te, lokola yango ezalaki na botau. Sikawa tóbanda kotánga, na molongo ya 12. Malamumu. Makila ya ba-ngombe mpe ya ba-ntaba ekokaki kosimba te, ekokaki kolongola lisumu te. Bótala.

Kasi moto oyo, (Moto nini? Episkopo? Te. Pápa? Te.)...

Kasi moto oyo, sima na ye...kopesa mbeka moko mpo na lisumu mpo na libela, afandaki na loboko ya mobali ya Nzambe;

Kobanda wana azali kozila kino banguna na ye bakomisama etielo na makolo na ye.

⁴⁸ Bomilengeli? Bomilengeli mpo na Liloba? Bóyoka likambo Oyo, bongo nalingi ete bótika Yango ézinda na kati. Bóyoka na bokebi.

Jambi na mbeka moko (mibu na mibu te, kolamuka sima na kolamuka te, liyangani sima na liyangani te, mokolo sima ya mokolo te) . . .

Kasi *na mbeka moko* asili k-o-b-o-n-g-i-s-a be (basili? Asili!) . . .

. . . *na mbeka moko* asili *kobongisa be* (yango nde eséngisi na Nzambe) *libela baoyo babulisami*.

⁴⁹ Yango mpenza. Yango nde eyano na liwa ya Klisto. Yango nde eyano na Kalvári. Na bosolo nyonso, ná Makila na Ye Moko, Ye asombaki masumu na biso, mpe abongisaki be mpo na libela, bandimi na Ye. Yango wana, kati na Klisto, totelemi na bozangi ekweli, na kobonga be liboso na Bozali na Nzambe na Nguyanyonso. Tozali bato oyo bazangi makoki, ná mateyo na biso moko; biso nyonso tolakisamaki ete tosengeli kokóma na esika moko boye, tosengeli kosala eloko moko boye. Te, ndeko na ngai mbali, ezali eloko moko te oyo osalaki; ezali oyo Nzambe asalaki mpo na Yo! Tozali sikoyo, soki tolongisami na kondima, tosili kobonga be mpo na libela liboso na Bozali na Nzambe.

⁵⁰ Na bongo Yesu alobaki, “Na yango bózala kobonga be.” Na bongo, ekomaki na kobonga be mpo na libela. Nzambe, na nzela na kufa na Klisto, eleki mibu nkoto moko nkama libwa, lelo, abongisaki be mondimi, oyo Ye amonaki liboso na kozalisama na mokili, mpo na libela. Mpe baoyo Abengaki, Alongisaki bango. “Baoyo Ye ayebaki liboso, Abengaki bango; baoyo Ye abengaki, Alongisaki bango; baoyo Alongisaki, Asili kokembisa bango.” Asili kobongisa be bandimi na Ye!

⁵¹ Sikawa bótala malamú, tózonga sikawa na molongo ya 1.

. . . *mobeko ezali elilingi na makambo malamú makoya, kasi bosolo mpenza ya makambo yango te, ekoki ata moke te na mbeka yango oyo ezalaki kopesama mbula sima na mbula mbala na mbala kokomisa moyei na kobonga be.*

⁵² Bótala “kobonga be,” yango nde tozali kolobela.

Soko ekokaki bongo, esengelaki te etikala kopesama? jambi mosambeli sima na kopetolama mbala moko akokaki lisusu te kozala na lisosoli ya lisumu.

⁵³ Olingi koloba nini? Liloba *lisosoli* wana, mpe ndimbola, ya solo, ezali “mposa”. Mpe soki moto ayei, mosambeli, na alima, liboso na Klisto, komonáká monyoko na Ye, mpe amipesi na Klisto, mpe alobi, “E Nkolo Nzambe, ezali na eloko moko te kati na ngai oyo ekoki kolongola lisumu, kasi na mobimba na ngai, nazali kotalela Yo,” na bongo Molimo Mosanto yango akoti kati na motema na moto, likambo oyo ya lisumu mpenza esili mbala moko mpo na libela, mpamba te mposa nyonso ya lisumu esili kolongolama na yo. Mpo soki mobeko ekokaki kosala yango, ba-mbeka wana elingaki kosuka te; kasi lokola ekokaki kosala

yango te, Klisto asengelaki kokufa, mpo na kokómisa biso na kobonga be.

⁵⁴ Banninga, ezali mpenza na makambo mingi oyo tokokaki koloba na mpokwa oyo, na ntina na bobongi be. Tozali ntango nyoso komeka kolongola mpoti na miso ya moto mosusu, komikomisa biso moko na mwa bosantu mpenza koleka oyo bango bazali—bazali. Kasi soki totali bobele elili, ezali bobele ngolu na Nzambe nde tozali oyo tozali.

⁵⁵ Eleki mwa ntango, awa na Ohio, nayekolaki likambo moko na ndenge ya makasi. Nazalaki na liyangani moko na Ohio, mpe nazalaki kofanda libanda na engumba. Likolo na boike na bato, nakokaki kofanda na kati ya engumba te.

⁵⁶ Tozalaki kolia na mwa restaurant moko ya Dunkard. Mpe ezalaki na mwa basali ya boboto moko ya basi, balataki malamumu mpenza, na bopeto nyonso ndenge basengelaki kozala, na lolenge mpenza ya basi ya lokumu, bazalaki kosunga biso. Ezalaki mwa esika moko kimia, mpo na kolia na esika mpenza ya bongo. Makusa na bango ezalaki kitoko mpe peto makasi. Mpe na mokolo na Lomingo bazalaki kokanga mpe kokende na losambo na bango. Nayokaki mwa nzala, esengelaki náteya mokolo ya Lomingo sima na nzanga.

⁵⁷ Mpe nakendeki na mwa esika moko moke ya mikolo nyonso...kaka mwa restaurant American moko ya moto nyonso, mpo na kozwa mwa eloko ya kolia. Mpe ntango nakotaki na ekuke, ndenge nayokaki makelele ya mashini ya masano ya mbongo ezobetabeta! Mpe mobali moko ya mbula na ngai atelemaki wana, oyo ntango mosusu azalaki moto abálá, ná loboko na ye ezingaki mwasi moko, wana azalaki kobeta mashini ya masano ya mbongo. Mobeko na biso mpenza, bobateli ya boyengebene na biso, ya biloko na biso, atelemaki wana ákobuka mobeko ya eloko oyo ye asengelaki kozala kobatela. Mpo, epekisami na mobeko kobeta masano ya mbongo na Ohio, kobeta mashini ya masano ya mbongo.

⁵⁸ Nabalukaki mpe natalaki na ngambo ya suka ya ndako yango, ezalaki na lisangá moko ya bilenge bana mibali, mpe miziki moko ya kala ya rock-and-roll ezalaki na mashini yango, ezalaki kobeta. Elenge mwana mwasi moko ya mibu pene na zomi na mwambe, ná molato ezolakisa nzoto na ye lokola mwasi. Kasi azalaki ya kotelema wana ná elamba na ye ekitá na nsé bongo na ngambo ya liboso, mpe moko na bilenge mibali wana, ná maboko na ye likolo na mwana mwasi, epai esengelaki kozala te. Mpe bazalaki kobenda makaya mpe komela masanga.

Bongo nakanisaki, “E Nzambe, ndenge nini Okoki koyika mpiko na yango?”

⁵⁹ Mpe natalaki na ngambo na loboko na ngai ya mobali, wana nayokaki moto moko kosala makelele moko ya konguluma. Mpe mwasi moko afandaki wana, azalaki ntango mosusu na

mibu ntuku motoba, to mibu ntuku nsambo. Alataki mwa bilamba wana ya nsoni mpenza, pene na ndambo ya molai ya makolo na ye, mpe misuni ya nzoto na ye ya koniúniúka ezalaki mpenza ya kofubala na ndenge wana. Mpe azalaki na lángi na mbebu na ye, mpe eloko moko ya motane-moindo na ngambo ya elongi na ye, apakólá-pakólá; alataki mwa sapato, ba-sandal, ná nzongolongo na misapi ya makolo, epakolamá; langi ya motáné-moindo, epakolamá na manzaka. Mpe nsuki na ye ekatamá mikúse mpenza, milelo-milelo, mpe etiamá langi ya bleu. Mpe natalaki ye.

⁶⁰ Mpe na ngambo ya mesa mibali mibale bafandaki, ná kwiti. Moko na bango (ezalaki eleko ya mói makasi) alataki mokóto ya kala moko ya mapinga, ná kitambala ezingaki nkingo na ye, ná mandefu na elongi na ye mobimba, kosaláká makelele mpe kokoba bongo. Mpe basengaki ye nzela ya kokende, mobali yango nde asengaki, mpe abandaki kobima kokende *boye* na esika ya zongo.

⁶¹ Natelemaki wana. Mpe nalobaki: “Nzambe, mpo na nini Okoboma eloko yango mobimba te? Mpo na nini kaka te Ózindisa yango na nsé na mabele mpenza?” Nalobaki, “Sarah na ngai moke ná Rebekah bakokóla nde kati na makambo mpenza ya motindo wana?” Nalobaki: “Ndenge nini Okoki, Nzambe, na bosanto na Yo monene, mpenza kotelema mpe kotala likambo ya ndenge wana, mpe kozanga kotinda koningana na mabele mpe kozindisa yango?”

⁶² Mpe etelemaki ngai wana, kokweisáká mwasi yango, ndenge nazalaki kosala, nazongaki moke sima na ekuke. Nayokaki Molimo na Nzambe koyela ngai, mpe nakotaki sima na ekuke.

⁶³ Mpe namonaki lokola eloko moko ezobaluka. Mpe ntango esalaki bongo, kati na emononeli yango, ezalaki nde mokili ezokoba kobaluka mpe kobaluka. Mpe wana ezalaki ngai kotala, zingazinga na mokili ezalaki na ezipelo moko ya motane, zingazinga na mokili. Mpe ntango nakómaki na mokili, namimonaki ngai moko, mwana moke mpenza, kosala makambo oyo nasengelaki kosala te; ntango mosusu ndenge *wana* te, kasi ezalaki lisumu. Mpe mbala nyonso oyo nazalaki kosala eloko moko, namonaki elilingi monene ya moindo wana kokende ngambo na Lola. Na lolenge ete, Nzambe akokaki koboma ngai na muníti wana.

⁶⁴ Bongo namonaki ya kotelema katikati na ngai ná Nzambe, Mbeka wana ya kobonga be. Namonaki Ye kotelema wana, ná ba-nzube na motó na Ye, mpe nsói kodiembela na elongi na Ye. Mpe ntango nyonso oyo masumu na ngai ezalaki kokende epai na Nzambe, Azalaki kobima mpe kokanga yango, lokola pare-choc ya motuka. Azalaki kobatela ngai na liwa. Mpe ntango nyonso oyo nazalaki kosala likambo moko ya mabe, Nzambe alingaki koboma ngai. Ya solo mpenza, bosantu na Ye eséngaka yango.

Mobeko na Ye eséngaka yango. Mpe ntango nyonso nalingaki kosala eloko moko, to yo olingaki kosala eloko moko, Makila na Yesu Klisto ezali kosala lokola pare-choc ya motuka. Mpe namonaki ezipelo yango ya motáné elingaki koloba ete, na ntango wana, ete Makila ezali naino kobatela mabelé.

⁶⁵ Mpe etelemaki ngai wana, nazotaláká, nabelemaki mwa moke koleka pene na Ye ntango namonaki Ye. Mpe nakokaki koyoka Ye koloba: “Tata, limbisa ye, ayebi te likambo oyo azali kosala.” Mpe natalaki na nsé, buku moko ezalaki wana. Mwanje moko azalaki wana oyo azalaki kotia makambo kati na bande kuna, atelemaki pembeni na Ye. Mpe mbala nyonso oyo nasalaki lisumu, etiamaki na buku yango. Mpe nkombo na ngai ezalaki likolo na yango. Mpe nayebaki ete mokolo moko, Ngai. . . ezipelo ya Makila wana ekolongolama mpe nakosengela kotelema liboso na Bozali na Nzambe, ná bomoi na ngai ya masumu. Kasi, namonaki, na mawa na Ye, Azalaki kopekisa kosambisama na ngai.

⁶⁶ Nakendeki epai na Ye, na komikitisa. Nafukamaki na mabólongo, mpe nalobaki, “E Yesu, Yo Mwana na Nzambe, nalongobani te mpo na koya liboso na Bozali na Yo. Kasi Okosepela kolimbisa ngai, mpo na oyo nasili kosala?”

⁶⁷ Asimbaki mopanzi na Ye na loboko na Ye, azwaki buku ya kala mpe akomaki “alimbisami” likolo na yango, abwakaki yango sima na Ye, mpe masumu na ngai elongwaki! Na sima Atalaki ngai, makasi mpenza na elongi, Alobaki, “Sikoyo Ngai nalimbisi yo, kasi yo olingi kokweisa ye.” Na bongo nasosolaki likambo oyo yango elingaki koloba.

⁶⁸ Wana ebimaki ngai na emononeli yango, Napusanaki pene na ye mwasi yango. Nalobaki, “Mbote?”

⁶⁹ Azalaki komela masanga. Atombolaki miso epai na ngai, mpe alobaki, “Oh, mbote.”

Nalobaki, “Nakoki kofanda?”

Alobaki, “Nazali na bato.”

⁷⁰ Nalobaki, “Nalingi koloba yango na lolenge wana te, madame. Nalingi bobele kosolola na yo, mwa moke.”

Alobaki, “Okoki kofanda.”

⁷¹ Mpe nalobaki, “Madame, eleki mwa miniti moke, nazalaki ya kotelema kuna sima ya ekuke wana. . .” Nabandaki koyebisa ye. Boye ntango nabandaki kotala, mpisoli ebandaki kokita na matáma na ye. Mpe ayebisaki ngai. . . Nalobaki: “Madame, ozali na ntina ya kosala makambo oyo te. Yesu akufáki, mpe kosambisama na Nzambe esili kolongolama na nzela na Makila na Ye. Ozali na ntina te ya kosala likambo oyo.”

⁷² Mpe alobaki, “Te, mesie.” Alobaki, “Tata na ngai azalaki mosungi na lingomba. Nakólá na ndako moko ya Boklisto. Mobali na ngai mpe ngai tozalaki bakambi kati na lingomba,

mpe tozalaki kobika bomoi ya Boklisto.” Abandaki koyebisa ngai, sima na liwa na ye. . . Azalaki na bilenge bana basi mibale, mpe apengwaki. Mpe ndenge nini bana na ye ya basi batikaki ye, mpe abebisaki bomoi na ye. Mpe akanisaki ete elikya ezalaki lisusu te mpo na ye.

⁷³ Kasi nalobaki, “Nzambe, yoka mawa! ‘Baoyo Ye ayebaki liboso, Asili kobenga bango.’”

Alobaki, “Yo nde Reverend Branham, oyo auti kuna?”

Nalobaki, “Ezali ngai.”

⁷⁴ Alobaki, “Nazali komiyoka nsoni mpo na ngai moko, ndenge nafandi awa boye.” Alobaki, “Okanisi ete libaku malamuru ekoki kozala mpo na ngai?”

⁷⁵ Nalobaki, “Yesu azali na maboko ma Ye masembolami, kozela yo óya, madame.” Mpe bato mosusu babandaki kotelema. Mpe nalobaki, “Okolinga kopusana awa na nsé elongo na ngai?”

Alobaki, “Nakosala yango, mesie.”

⁷⁶ Nasimbaki ye na loboko. Nalobaki, “Ozali pene na mbula ya mama na ngai. Okolinga kobeta mabolongo awa elongo ná ngai, awa na nsé?” Mpe wana na nsé, tokomisaki esika yango, sima na nzanga wana, liyangani moko ya lolenge ya kala. Mpe Nzambe abikisaki mwasi yango, na ngolu na Ye. Amilatisaki ye moko mpe ayaki na liyangani, mpe, na ndenge nayebi, azali kobika bomoi ya Moklisto na mpokwa oyo.

⁷⁷ Ezali nini? Oh, Nzambe aséngeka bobongi be! Aséngaka mbongwana ya motema na yo. Aséngaka bosembo na yo epai na Ye. Kasi Azali kotala na mpokwa oyo. Etali te boni boni yo osumukaki, ézala moke to ézala ebele ozali naino mosumuki, mpe okoki kokóma na nzela mosusu te bobele na nzela na Yesu Klisto, Mbeka na Nzambe oyo-ekoki-na-nyonso. Mpe kati na Ye obongi be mpo na libela. Bókanisa yango! Ezali eloko moko te oyo yo osalaka. Ezali te makambo ya sika oyo obandi. Ezali te bomoi ya sika obandi. Ezali koyambola mabe na yo, mpe ngolu na Nzambe epai na yo. Yango ekomema yo na bobongi be, na bongo okomi na kobonga be kati na Yesu Klisto.

⁷⁸ Natii motema ete, na mpokwa oyo, moninga na ngai, wana tozali awa na ngonga ya motuya monene oyo sikoyo, na ntango mikano esengeli kozwama sima na koyoka lisolo oyo. Ntango mosusu otikalá koyoka yango te liboso. Kasi okoki kobima na moko na bikuke oyo te na moto na lolenge yango moko oyo okotaki, esengeli kobima malamuru koleka to mabe koleka.

⁷⁹ Mpe wana togumbi mitó kaka mpo na ngonga moke, nalingi ete bókanisa mingi mpenza na ntina na likambo yango. Ndenge nini mpo na elimo na yo na mpokwa oyo? Yesu Klisto akufaki mpo na yo.

⁸⁰ Okoloba: “Ndeko Branham, ntango nakokoka kotika komela makaya, ntango nakokoka kotika komela masanga, ntango

nakokoka kosembola likambo oyo, nakosala yango.” Oh, ekotikalá kosalama malamumu ata moke te. Okokoka kosala yango ata moke te. Mpo na nini oyei te motindo oyo ozali? Mpe, na kondima, kende na Etóko wana, oyo ba-mpota na Yo ezali kobimisa, na bongo bolingo ya lisiko ézala lisolo na yo, mpe ekozala bongo kino okokufa.

⁸¹ Mpo na nini kozwa eloko mosusu? Mpo na nini komeka kokóta na nzela ya lingomba na yo? Mpo na nini komeka koya mpo otiki komela masanga to otiki kokosa? Yaka na nzela ya kobonga be! “Mpo, na nzela ya Mbeka moko, Asili kobongisa be mpo na libela baoyo babulisami.”

“Nakobulisama ndenge nini?”

⁸² Yámbólá masumu na yo Liboso na Makila na Yesu; mpe Bomoi oyo euti na Makila wana, ekozonga epai na mosambeli, mpe ekobulisa ye longwa na ba-mposa ya makambo ya mokili. Mpamba te, na nzela na Mbeka oyo-ekoki-na-nyonso, Asili kobulisa biso; Molimo moko, biso nyonso tobatisami kati na Nzoto moko. “Sikawa kokweisama ezali te mpo na baoyo bazali kati na Klisto Yesu, epai na baoyo batambolaka na mposa na nzoto te, kasi na Molimo.” Soki ozali komeka kotambola na Molimo, mpe ozali kokoba na mposa mabe ya nzoto, Mbeka etiami naino na mobimba te epai na yo. Kasi mosambeli oyo abulisami mbala moko, azali lisusu na mposa ya lisumu te.

⁸³ Oyo wana ezalaki Kalvari. Ezali esika ya koteka ba-fololo te, to mwa esika ya kosala likambo *oyo* to *oyo wana*. Ezalaki esika oyo Nzambe ná moto bazongisaki bondeko. Ezalaki esika oyo kimia mpe kobatelama ebongi be epesamelamaki na libota ya bato. Okoki kokende elongo ná ngai, na mpokwa oyo, moninga na ngai mosumuki, na Kalvári, mpe na kondima ótia Makila oyo na elimo na yo moko, mpe ótika Molimo Mosanto koya mpe kobulisa yo na nzela ya Mbeka monene na Ye?

⁸⁴ Liboso ete tóbondela, okolinga kotómbola loboko epai na Nzambe, mpe koloba, “Yokela ngai mawa, Nzambe. Sikawa nayamboli masumu na ngai nyonso, na mpokwa ya mokolo ya Mitano Esantu oyo. Mpe nasepelaka na monyoko monene oyo Klisto asalaki mpo na ngai. Sikawa, natiki mokano na ngai moko, ba-mposa na ngai moko mpe makambo nyonso, mpo na kolanda Yo bandá lelo oyo, kino libela.” Okolinga kotombola loboko, koloba: “Kanisa ngai, Ndeko Branham, na libondeli. Yango nde mokano ya motema na ngai”? Ezali na moto moko, na mpokwa monene oyo, wana ezali biso kozela mwa moke? Awa na ngambo ya loboko na ngai ya mobali, ezali mpenza na moko kuna. Ozali na nsoni ya masumu na yo? Ozali na nsoni ya oyo osalaki?

⁸⁵ Mokili lelo ezali koluka bilombé. Mpe ezali na bilombé, na ndenge ya nzoto.

⁸⁶ Mokolo moko kuna na Suisse, ntango Suisse ezwamaki kati na mobulungano, lipinga moke ya bato ya Suisse bayanganaki libanda na bilanga na etumba, mpo na kobunda—kobunda na ntina ya nkita na bango. Lipinga monene ya babundi ezalaki koyela bango elekaki bango na monene; bayekolisamaki malamumu, bazalaki na makongá mpe ba-nguba minene. Bato ya Suisse bakokaki kosala eloko mosusu te bobele kotika. Bakómaki na suka mpo ngomba ekangaki bango na sima. Na bongo elombé moko abimaki. Esengelaki moto moko ákufa. Mpe soki babungisaki etumba . . .

⁸⁷ Bazalaki na eloko moko te kaka biteni ya bibende, mabanga, ná banzeté, mpo na kobunda na yango. Na ntango oyo lipinga oyo ezalaki koya ezalaki lokola etutu ya briki. Soki bakonzamaki, balingami basi na bango bakozuama na makasi, bilenge bana basi na bango bakokozuama na makasi, ba-bebé na bango bokobomama, mitó na bango ekopasolama, mpe ba-ndako na bango ekobotolama, biloko nyonso ekobunga.

⁸⁸ Bongo ezalaki na mobali moko, nabosanaka nkombo na ye noki mingi, nkombo na ye Arnold von Winkelried. Apusanaki, mpe alobaki, “Mibali ya Suisse, lelo oyo nakopesa bomoi na ngai mpo na Suisse.” Alobaki, “Kuna na ngambo ya ngomba, mwa ndako moko ya mpembe ezali. Nazali na mwasi mpe bana misato bazozela ngai. Kasi bakomona ngai lisusu te, mpo, lelo oyo nakopesa bomoi na ngai mpo na Suisse.”

Balobaki, “Okosala nini, Arnold von Winkelried?”

⁸⁹ Alobaki, “Bólanda ngai, mpe bósala nyonso ya malamumu koleka oyo bokoki kosala ná nyonso oyo bozali na yango.”

⁹⁰ Mpe abwakaki miso na mapinga yango kino amonaki esika makonga ezalaki ya eboke makasi. Na bongo atombolaki maboko na ye likolo, mpe apotaki mbangu epai wapi etutu ya makonga ezalaki, mpe agángaki, “Bópesa nzela mpo na bonsomi! Bópesa nzela mpo na bonsomi!” Nkama na nkama ya makonga etalisamaki na ngambo na ye mpo na kopekisa ye áleka; afungolaki maboko na ye mpe asangisaki yango nionso na ntolo na ye moko, yango ebambaki ye na nse, mpe akufaki na songé ya makonga yango. Bato ya Suisse wana balandaki ye ná bibóta mpe biteni ya nzete. Etaliseli monene wana ya bo-elombé ekimisaki mapinga yango, kino bato na Suisse babetaki mpe babimisaki bango na mboka yango. Mpe batikálá kozwa etumba lisusu te bandá mokolo wana kino lelo oyo.

⁹¹ Telema na Suisse mpe tánga nkombo ya Arnold von Winkelried, okomona ndenge mpisoli ekotanga na matáma na bango. Mpo na nini? Abikisaki mboka na bango. Wana ezalaki mosala monene ya elombé. Ya kokokanisa ná yango ezali mpenza te, mpe etikálá koleka yango te, na mabelé oyo.

⁹² Kasi, oh, yango ezalaki likambo moko ya moke na oyo esalemaki mokolo moko! Ntango libota na Adama eyaki, ba-

zabolo bazalaki kobimela bango na ngambo nyonso, basakoli bakweaki, mobeko ekweaki, mbeka ya ngombe mpe ya banampate ekweaki, lolenge ya moto ekweaki, nyonso. Mpe libota moke ya Adama ezalaki wana, elongamaki; bazalaki motango moke liboso ya ba-zabolo, bindima-ndima, makono, maláli. Ezalaki na Moko oyo abimaki uta na Likolo, mpe alobaki, “Lelo oyo nakokufa mpo na libota ya Adama.” Ayaki na mokili mpe akomaki mosuni. Atalaki mpenza katikati ya esika oyo makonga ezalaki molili koleka. Molili ya makasi mpenza koleka nyonso na nsomo epai na moto ezalaki kufa, mpe Azwaki kufa kati na Ye. Mpe na Kalvári Afutaki mbeka, mpe agángaki, “Bópesa nzela mpo na Bonsomi!”

⁹³ Mpe Azali kogánga na Lingomba na Ye, “Bókamata Oyo Natikeli bino, Makila na Ngai mpe Molimo na Ngai, mpe bobunda na nyonso oyo bozali na yango.” Tokoki kolonga na mpokwa oyo, na nzela na Yango, moninga. Okoki kobengana zabolo mosika na yo. Monguna nyonso ya kala oyo azali na bomoi na yo, akoki kobwakama libanda ya Makila mpe Molimo na Klisto, mpe okoki kotelema ya kobonga be liboso na Bozali na Ye. Klisto afungolaki nzela!

⁹⁴ Okoki na yo bobele kotombola loboko na yo epai na Ye, mpe koloba, “Limbisa ngai”? Nzambe ápambola yo, ndeko mobali. Moto mosusu, “Yokela ngai mawa, Nzambe, nayamboli sikawa mabe na ngai”?

⁹⁵ Ezali na moi-lingomba moko ya móto te mpio te oyo akendeke na losambo mokolo nyonso, mpe ntango mosusu amekaka kozala moyengebene na ndenge nionso, kasi ata bongo oyebe ete kosilika wana, kozanga bopolo, mpe moyimi, ná bizaleli oyo ezali kokanga yo na nsé kino ozangaka elonga? Okolinga kopetolama na nzela na Makila, na mpokwa oyo, longwa na oyo nyonso wana? “Mpo ete mosambeli asili kopetwa mbala moko azali lisusu na lisosoli te. . .” Okolinga kotómbola loboko, yo mondimi ya losambo? Nzambe ápambola yo, madame. Tombola maboko mpe loba: “Ndeko Branham, kanisa ngai kati na libondeli.” Nzambe ápambola yo, madame. Ya solo. Wana ezali mpenza. . . Wana ezali likambo ya solosolo ya kosala. Nzambe ápambola yo kuna na sima, mesie.

⁹⁶ Moto mosusu tombola loboko, lobá: “Yokela ngai mawa, Nzambe. Nayebi ete nayambolaka Boklisto na monoko, kasi nazali kobika yango te. Nayebi ete nazali bongo te. Mpe na motema na ngai, nazali mpenza na alimá ná Yo te. Nalingi kozala moko na baponami na Nzambe. Nayoki na motema na ngai ete nazali bongo, kasi natikálá kotika mikumba na ngai te oyo ezali kolonga ngai na pete. Mpe nalingi kotia yango pembeni na mpokwa oyo. Mpe, na ngolu na Nzambe, nakosala yango. Bóndela mpo na ngai.” Okolinga kotombola loboko? Nzambe ápambola yo, madame. Moto mosusu. Tozozela mwa moke.

97 Wana tozali kozela na kimia, bino nyonso sikawa, wana bogumbi mitó na mabondeli, bóyemba malembe-malembe sikawa.

Liziba moko ezali, oyo etondi na Makila,
 Oyo ebimi na misisa ya Emanuele,
 Mpe basumuki babwakami na kati na
 yango. . .
 Bakobungisa matónó na bango nyonso ya
 kokweisama, bakobungisa. . .

98 Bokoki kokanisa yango sikawa, boye te? Komeka kosukola yango na maboko na yo te. Klisto azali na maboko na yo.

99 Pilata amekaki yango, na tongo oyo, pene na ngonga ya motoba ya ntongo; kasi maboko na ye ezali kaka na makila, makila ya kokweisama. Boyebi eloko nini ekómelaki ye. Akendeki na Suisse, mibu ebele na sima, abungisaki mayele na ye, amibwakaki na liziba ya mai moko mpe akufaki. Na ntongo oyo, na Suisse, bato nkama na nkama bayáka kotala likambo yango, mai ya langi ya bléu etokaka longwa na nsé ya libulu monene ya mai wana. Basalaka yango mobu nyonso. Ezali lisapo ya kala, balobaka ete Nzambe aboyaki ete mai epetola maboko na ye.

100 Ndeko, etali te mbala boni osili kobatisama, ézala eloko nini okomeka kosala, eloko moko te ekopetola maboko na yo bobele Makila na Klisto. Nzambe aboyaki yango. Mpe mai ya bleu, sima penepene na mibu nkoto mibale, ezali kaka kotoka. Nzambe aboyaki yango. Boyengebene na yo moko ekoki kopetola masumu na yo te. Eloko mosusu te bobele Makila na Yesu! Bókanisa likambo yango sikawa. Tokobondela, sima na mwa ngonga.

101 Nazomituna soki nakokaki kotuna likambo moko na mpokwa oyo. Ntango Atelemaki wana na esambiselo ya Pilata, na ntongo oyo, mpe alobaki, “Soki Bokonzi na Ngai ezalaki ya mokili oyo, Nakokaki kosolola na Tata na Ngai mpe mbala moko Alingaki kotindela Ngai mapinga zomi na mibale ya Banje.” Na ntango oyo, moko na bango akokaki koboma mokili. “Nakokaki kosolola na Ye, mpe mapinga zomi na mibale ya Banje balingaki kozala na mbala moko mpo na kosunga Ngai.” Akokaki kosala yango. Kasi Atelemaki wana, na bopolo mpe na komikitisa, mpo na kozwa kufa na yo mpe kozwa masumu na yo.

102 Okolinga kopesa matondi ya kokoka mpo na Mbeka wana na mpokwa oyo, bino baoyo bozali na bosenga na yango, mpe na bosenga ya mapamboli na Nzambe, bokolinga kotelema mpo na libondeli oyo? Bótelema kaka, bino baoyo bolingi ete bakanisa bino na libondeli oyo, boloba, “Nzambe, yokela ngai mawa. Nakwei na likambo, nasali makambo ya mabe, mpe sikawa nalingi koyamba bolimbisi na ngai na nzela na Klisto Yesu.” Okolinga bobele kotelema na makolo na yo na ngonga oyo?

Nzambe ápambola yo, elenge mwasi. Yango nde mpiko. Tikala ya kotelema kaka wana.

¹⁰³ Olingi koloba na ngai ete otómbolaki loboko, mpe na nsima ozali na sembo ya kokoka te mpo na kotelema na makolo na yo? Bolamu nini nde Nsango Malamu etikálá kosalela yo? Oh, oyo mpenza kosakana na losambo, kosakana na Nzambe! Ngonga ebelemi kokoma na suka, moko na mikolo oyo bombe atomique ekobeta esika moko awa, kati na moko na ba-usine minene ya masasi oyo. Ekozala ata na sekonde moko te ya kokanisa likolo na likambo yango. Ntango ekosila koleka mpenza, mpe ntango mosusu liboso na Pasika oyo ekolanda, to ata na Pasika oyo. Bokolinga te kotelema sikawa, mpe koloba, “Nzambe, yokela ngai mawa, ngai mosumuki. Nayambi sikoyo Klisto, na nzela ya komipesa na Ye moko lokola mbondi mpo na masumu na ngai. Mpe na ngolu na Ye, mpe bobele ngolu na Ye, nazali koumela Liboso na Nzambe.” Okoki koyambola mabe na yo? Ye oyo akobomba masumu na ye, akolonga te. Ye oyo akoyambola masumu na ye, akozwa ngolu. Ezali na maboko na yo. Azali kotala.

¹⁰⁴ Sikoyo, Nkolo na biso Mopambolami, kati na motango molongobani na mpokwa oyo milimo misato oyo babongoli mitema, batelemi awa, mobali moko mpe basi mibale.

¹⁰⁵ Wana nazali kokanisa, Nkolo, na ntina na Kalvari, ntango moko na ngambo moko, alobaki, “Nkolo, kanisa ngai ntango Okoya na Bokonzi na Yo”; mosusu alobaki, “Soki Yo ozali, tika ete tómona ekamwiseli, longola biso na ekulusu mpe mibikisa Yo mpenza.” Mpe oyo mosusu alobaki, “Nzambe, yokela ngai mawa.” Mpe motó na Yo etengamaki na ngambo na yango ya mobali, mpe olobaki, “Lelo okozala elongo ná Ngai na paladiso.” Kasi Ozalaki kimia epai na mosusu, mpo kobongola motema ezalaki te.

¹⁰⁶ Mpe, Tata Nzambe, nabondeli ete baoyo ntango mosusu. . . nazolikia ete bazalaki bobele bango misato kati na ndako, baoyo bayoki ete bazali na bosenga ya koyambola mabe na bango. Kasi bayei nde na nzela ya oyo-ekoki-na-nyonso, na nzela ya ekulusu. Limbisa bango, Nkolo, mpe pambola bango. Batelemi awa na mpokwa oyo; lokola otelemaki mpo na bango, na lopango-ya-esambiselo ya Pilata; lokola Yo otelemaki mpo na bango, katikati na Lola mpe mabele, ntango moi elimwaki mpe sanza ekokaki kopesa pole na yango te, mpe ezipelo ya tempelo epasukaki longwa likolo kino na nsé. Nabondeli, Nzambe, ete Opambola bango mpe ópesa bango mawa na Yo, mpe ópétola bango na Makila na Yo. Mpe batisa bango na Nguya na Yo ya kobulisa, kati na Nzoto ya Mwana na Yo Moko, Klisto Yesu, na bongo bakomi ya kobatelama mpo na ntango mpe Seko-na-seko. Pambola bamosusu nyonso oyo bazali komiyoka ete bazali malamú mingi, ete basili kokokisa likambo oyo mpe basalaki yango. Nabondeli lipamboli oyo mpo na bango, na Nkombo na Klisto. Amen.

¹⁰⁷ Nzambe apambola bino. Mpe bino baoyo botelemi pembeni na baoyo batelemaki, bóbelema pene na bango mpe bópesa bango mbote ya maboko, na moto moko, mpe bóloba, “Nkolo ápambola yo,” ezali malamú, lokola mbote ya bondeko.

¹⁰⁸ Tozali sikawa mwa moke sima na ntango ya liyangani na biso. Bato boni balingi Nkolo Yesu, bótombola loboko? Nazali komituna, na kimia sikoyo, to kaka na kimia nyonso oyo tokoki, kati na ekaniseli ya Ye Oyo azali bisika-nyonso, oyo azali awa na mpokwa oyo, soki tokokaki koyemba na malembe.

Ezalaki kuna na ekulusu esika Mobikisi na ngai akufaki,
 Kuna nde nalelaki mpo na kopetolama na masumu;
 Kuna na motema na ngai (ntango okokisi eséngisi yango, otiaki maboko likolo na Yango), kuna, na motema na ngai Makila etiamaki;
 Oh, nkembo na Nkombo na Ye!

Tika ete tóyemba na malembe sikawa, wana ezali biso kogumba mitó na biso epai na Ye.

Kuna na ekulusu epai Mobikisi na ngai akufaki,
 Kuna nde nalelaki mpo na kopetolama nmasumu;
 Kuna nde Makila etiamaki na motema na ngai;
 Nkembo na Nkombo na Ye!
 Nkembo na Nkombo na Ye, Nkombo ya motuya!
 Nkembo na Nkombo na Ye ya motuya!
 Kuna nde Makila etiamaki na motema na ngai;
 Nkembo na Nkombo na Ye!

¹⁰⁹ Sikawa na kimia nyonso, wana bogumbi mitó. Bino baoyo bobikisami, bóloba, “Oh . . .” Bótombola maboko sikawa.

Oh, Liziba kitoko oyo ebikisaka na masumu!
 Nazali na esengo mingi ete nasili kokóta kati;
 Kuna Yesu abikisi ngai mpe abateli ngai peto;
 Nkembo na Nkombo na Ye!
 Nkembo na Nkombo na Ye ya motuya!
 Nkembo na Nkombo na Ye ya motuya!
 Kuna nde Makila etiamaki na motema na ngai;
 Nkembo na Nkombo na Ye!

¹¹⁰ Sikoyo ná maboko na bino bokitisi, mitó na bino egumbami. Nauti kokanisa yango; moto moko abengaki eleki mwa ntango, mpe alobaki moto moko alingaki ete bakanisa ye na mpokwa oyo kati na libondeli, na ntina na nzoto na bango. Bakokaki kozonga te na liyangani mokolo ya Lomingo na mpokwa, mpo

na liyangani monene ya lobiko na nzoto. Bokolinga kotelema na makolo na bino, bino baoyo bolingi ete tókanisa bino na libondeli yango sikawa?

. . . na motema na ngai Makila matiamaki;
Nkembo na Nkombo na Ye!
Nkembo na . . .

¹¹¹ Sikawa, wana bogumbi mitó. “Ye azokisamaki mpo na masumu na bino, atútamaki mpo na masumu na bino ya nko, etumbu oyo eyeiseli bino kimia ezalaki likolo na Ye, mpe na mapipi na Ye, bino bobikisami.”

Nkembo na Nkombo na Ye!

¹¹² Sikoyo, Tata Mopambolami, wana tozali kobelema na ekulusu na komikitisa sikawa, epai wapi ngolu mpe mawa ezwaki ngai, kuna mpe Monzoto Mongengaka ya Ntongo ezali kosopa ba-pole na Yango zingazinga na ngai. Babeli oyo batelemi Liboso na Yo. Bazali kondima sikoyo mpenza, ete na nzela ya kondima, bazali kotala mokongo oyo etondi na mpóta, kuna na ngambo. “Mpe na mapipi na Ye nde tobikisamaki.” Tata Aleki na Bulee, toyei koyambola kondima na biso, na kondimáká ete Obikisi nzoto na biso ya bokono, na nzela na mpasi ya monyoko monene ya Nkolo Yesu. Mpe tosengi mpo na bato oyo batelemi, libondeli ya kondima, oyo Olakaki ete ekobikisa babeli. Mpe biso, nyonso elongo, lokola lisanga ya bandimi na Yo na mpokwa oyo. Olobaki, “Epai wapi bato mibale to misato bayangani, Nakozala katikati na bango.” Mpe tosengi mawa mpo na bango, ete ngolu na Yo ékoka kosimba kati mpenza ya elimo na bango, ete eloko moko ekokangama lokola lóngo na nse na bozindo kuna; ete bakoyeba ete Klisto azali awa mpe asololaki na bango, koloba, “Mwana na Ngai, Nazwaki bokono na yo kuna na Kalvari. Sikawa bwaka kaka mitungisi na yo likolo na Ngai, mpo Nazali kobatela yo.” Mpe tika ete bábíkisama, na mobimba nyonso, mpo tosengi yango na Nkombo na Yesu. Amen.

¹¹³ Mpe wana bazali kofanda sikoyo, moto oyo azali pene na bango, tia maboko na yo likolo na bango, moto moko oyo azalaki kobondela mpo na bango. Biblia elobi, “Bakotia maboko likolo na babeli; bakobika.” Nkolo apambola.

¹¹⁴ Soki namikosi te, nazali nde kotala mobali oyo abikisamaki awa eleki mwa mikolo, to eleki ba Lomingo mibale to misato, yango ezalaki kokufa matoi to eloko moko kati na matoi, boye te? Namoni ozali kosepela na liyangani na mpokwa oyo. Ozali koyoka ngai malamau sikawa? Ezali malamau. Kitoko mingi! Telema bobele mwa moke. Bato boni bazali koyeba lisusu ete azalaki awa? Alekaki na molongo ya mabondeli, bamemaki ye lisusu na etumbelo, mpe Nkolo abikisaki ye mpe akomisaki ye malamau. Nkolo ápambolama! Matondi, ndeko, mpo na litatoli na yo. Ekokaki kozala na nzela ya zomi na mibale mbala na mbala! Kasi Azali malamau mingi, boye te?


¹¹⁵ Sikawa, tolingi komona bino lobi na mpokwa, na ntongo ntongo. Na bongo mokolo ya Lomongo, na ntongo ntongo. Mokolo ya lomongo sima na nzánga, mpe soki bokoki kozonga mpo na liyangani ya kobondela mpo na babeli mokolo ya Lomongo na mpokwa. Kino tokokutana, tótelema mpo na koyemba nzembo na biso ya bokabwani, “Mema Nkombo na Yesu.”

Mema Nkombo na Yesu elongo na yo,
 Mwana na bolozí mpe na mawa;
 Ekopesa yo esengo mpe kobondisama...
 (Baluka mpe pesa mbote ya loboko sikawa
 na moto nyonso.)
 Mema Yango bisika nyonso okokende.
 Nkombo ya motuya, (baluka mpe pesa mbote
 ya loboko), Oh, eleki kitoko!
 Elikia ya mokili mpe esengo ya Lola;
 Nkombo ya motuya, Nkombo ya motuya, Oh
 eleki kitoko! Eleki kitoko!
 Elikia ya mokili mpe esengo ya Lola.

Sikoyo bótala ngambo oyo.

Tokogumbamela Nkombo na Yesu,
 Tokofukama na makolo na Ye,
 Tokolatisa Ye motóle lokola Mokonzi na
 bakonzi na Lola,
 Ntango mobembo na biso ekosila.
 Nkombo na motuya, Oh eleki kitoko! Oh eleki
 kitoko!
 Elikia ya mokili mpe esengo ya Lola;
 Nkombo ya motuya, Oh eleki kitoko! Eleki
 kitoko!
 Elikia ya mokili mpe esengo ya Lola.

¹¹⁶ Sikoyo bóbosana te chorale Neville, liteya na radio na ntongo, WLRP, na ngonga ya libwa na ntongo. Mpe Ndeko Stricker akobanda na ngonga ya libwa ná miniti ntuku minei na mitano, Mokolo ya Lomongo na ntongo. Nazalaki kaka kosala bande moko mpo na ye sima na nzanga oyo, likolo na lisekwa.

¹¹⁷ Mpe sikawa, kino tókutana lisusu, mapamboli ya Nkolo ézala elongo ná bino, wana togumbi mitó. Mpe nakosenga na moninga na ngai malamú mpe ndeko mobali, Ndeko Palmer, ya Macon Georgia, soki akolinga kosukisa losambo oyo na liloba moko ya libondeli, wana tozali kobondela. Ndeko Palmer. 

BOBONGI BE LIN57-0419

(The Perfection)

MAYANGANI YA KOLAMUKA YA PASIKA

Liteya ya Ndeko William Marrion Branham oyo, eteyamaki liboso na Anglais Mokolo ya Mitano Mosanto na mpokwa, na 19 sanza ya minei, 1957, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2022 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org